

摘藻堂四庫全書薈要

集部

欽定四庫全書薈要卷一萬五千七九十

集部

盤洲文集卷四十

宋 洪适 撰

表二十七首

謝郊祀禮成加恩表

伏念臣待罪山陰依光日下遇聖主再郊之歲有闕包茅均泰元三獻之釐遂霑細札既衍井畬之賦更叨公社之封

中謝

茲蓋伏遇皇帝陛下澤欲下流福非專鄉

奉瑄玉而饗帝已貳緝儀坐酎金而奪侯悉除弊法故

茲陟典猥及微臣誓堅存闕之忠用侈傳家之慶臣無任

謝賜銀合臘藥表

承流無補久懷視蔭之慚拜況有光斯免負薪之疾鴻私曲被弱質難勝

中謝

臣聞出璽賜金漢室用旌於良

吏剪鬚和藥唐宗以療於元勳惟聖朝獨異於藩垣故頒式並行於伏臘恭惟皇帝陛下仁如天覆恩與風翔帝堯立四時之官式謹司冬之令神農審百草之味蓋

存濟衆之心軫此下臣錫之名劑使積疴之去體期後效以捐軀臣無任

謝提舉臨安府洞霄宮表

典股肱之郡曠職懷憂領香火之祠拜恩從欲譴訶獲免銘鏤難言中謝伏念臣姿稟凡庸智能局促獨玷前疏之殊遇遂登右鼎之巍班數月盡心罔有一毫之補衆言銷骨欲行四罪之誅仰賴簡知第從策免未皇黔突即忝專城念牧人御衆之難體責實循名之政妄欲

抑強而宣化未嘗畫諾以養高自恨斗筭之材訖無尺
寸之效況以早衰之蒲柳居然遠想於枌榆屢貢忱詞
始諧歸志奉三年之計有媿前塵起千里之行復闕故
步此蓋伏遇皇帝陛下軫憐舊輔宣布異恩茲聞同產
之對敷復辱淵衷之稱獎記臣立朝之宣力深咎懷奸
之人察臣守土之寡尤曲徇養病之請少休疲滿曷報
生成衡宇可瞻雖幸眇柯之適長安浸遠但馳傾藿之
誠臣無任

賀天申節表

太階平而玉衡正甫臨九夏之中聖人出則里社鳴斯
慶千秋之節

中賀

恭惟太上皇帝陛下道隆衆父德邁

三皇博衍優游享尊親之大養聰明光宅授翼子以燕
謀茲逢流渚之辰共上呼嵩之祝臣獲休鄉閭莫預廷
紳想萬壽之稱觴袞龍拜手望九陔而貢牘螻蟻馳情
臣無任

賀郊祀禮成表

致慤竹宮簡靈辰而允協流光珠幄慶誌祀之備成德
動九垓驪傾六幕中賀竊謂聖人然後能饗上帝所以
降康周室庀官奏黃鍾大呂之樂漢京紀瑞作赤鴈白
麟之歌於鑠昌朝高邁前躅恭惟皇帝陛下應天尚實
除地揭虔格悅近來遠之和崇交神塞明之報四圭有
卽穆然祇栗之容八陛為壇絜爾靜嘉之薦星輝雲潤
乾清坤夷納鴻祐以無疆薰嘉生於有截臣駿奔跡遠
率舞情深建太常之辰旒載欣跋事奉有司之瑄玉徒

想侍祠臣無任

賀太上皇帝加尊號表

禮尊丕冊慶溢慈宮凡厥式圍率皆擊壤

中賀

恭惟皇

帝陛下垂衣三紀脫屣萬機鼎來高厚之祥泰處希夷之樂唯天比大蕩蕩乎無能名以道自娛恢恢其有餘地洊隆名號共睹緝儀臣退伏故鄉逖聞盛典上玉卮之壽莫躋拜下之班紉金匱之書獨仰光前之績臣無任

賀壽聖明慈太上皇后加尊號牋

蒐舉緝儀鋪張寶冊福歸慈禁喜浹繇區

中賀

恭惟皇

后殿下體德坤元儷尊乾極一成祀夏資內助以經邦
三母翼周絕外言之入梱偕享壽康之樂游加光大之
稱臣遙睇龍墀莫班鷺綴播傳鉅典益隆邇日之明歌
詠徽音願續倪天之雅臣無任

兩宮加尊號賀皇帝表

瑞集慈闈冊尊顯號詔音所布驩頌載騰

中賀

恭惟皇

帝陛下德邁義農行高曾閔繩武有鑒乾之志問安得
治國之經堯以受命為憂正享倦勤之樂舜盡事親之
道益隆賓賓之名臣久去雲霄遠藏田野拜表章於興
慶身隔班行蒐禮典於曲臺心傾儀注臣無任

立皇太子賀太上表

英主守文協重華於盛旦元儲繩武開洊震之休符慈
禁益尊皇圖有永

中賀

恭惟太上皇帝陛下德垂後裔

道冠前王萬方懷覆物之仁十載享倦勤之樂五帝足

六揭巍巍蕩蕩之名一日見三衍繼繼承承之慶臣身
居鄉社心係宮庭莫參振鷺之班祇益抃鼇之喜臣無
任

賀皇帝表

吉日臚傳前星彪列布宣細札鼓舞綿區

中賀

恭惟皇

帝陛下聖德無前英規復古深惟國本之重默契天心
之公龜筮既從袞龍獨斷故受以艮兆三索之珍符相
見乎離著重明之上象臣退藏田野遐想闕庭徒存拱

極之誠莫覩呼嵩之慶臣無任

賀皇太子牋

覆載凝符元良主鬯慶開宗社驩動幅員

中賀

恭惟皇

太子殿下仁孝生知溫文日就天開地闢已題再造之
期海潤星暉於赫重光之瑞兩宮有喜萬祀無疆某逖
處故鄉欣聞徽典馳心鶴禁莫窺鏤牒之文矯首鴻儀
徒想班庭之禮某無任

謝郊祀加恩表

熙事光前對泰壇之嘉況慶條逮下行井邑之新腴仰

望明廷敬祗茂渥

中謝

伏念臣退休故里遠隔上都想

進幣於中宵莫瞻三獻記執綏於曩日又見兩郊何期

商賚之行亦在周行之數茲蓋伏遇皇帝陛下誠格穹

壤孝寧廟祧禮既講於逆釐意實顯於歛福惟漏泉之

澤已浹邇故增戶之恩靡分中外臣深知禮屈益媿

名浮竊幸逸居得養漳濱之疾敢循文具輒辭卹殿之

封

會慶節賀表

日臨析木光凝北陸之躔星仰流虹瑞起南山之頌式
圍所暨拱極道同

中賀

恭惟皇帝陛下德煥重華志圖

再造總綱振領尊居蠖濩之中越契踰繩何取鴻荒之
際皇風載避協氣橫流卓哉彌月之祥申以後天之祝
臣庇身尺地矯首咫尺顏百辟奉觴茲數十年之慶九垓
衍筭已題萬壽之期

天申節賀表

伏以十載倦勤享天極彌高之祉萬方介壽增電樞有
永之符聲教所覃驩呼競集中賀恭惟太上皇帝陛下
化行禹貢德廣堯仁乃武乃文濟興王之大業已安已
治授聖子以詒謀誕開金殿之祥荐講玉卮之慶臣退
居故里阻望嚴宸徒傾葵藿之誠莫布松椿之頌

謝加恩表

圓丘展寀驩已接於靈旂中禁均釐恩遂加於上笏寵
光所及震悸靡寧中謝伏念臣一去闕庭三逢郊類包

茅何有職弗預於駿奔食采益增心甚慚於饗食竊茲蓋
伏遇皇帝陛下福非專鄉澤欲旁流其出如綸尚暨要
荒之服多與之邑不遺小大之臣故此慶條逮於舊弼
臣潜山已老報國無階雖深僂僂之情實負陪敦之渥
臣無任

賀太上皇帝加尊號表

禮崇寶冊瑞湊慈宮凡在提封率皆踴躍

中賀

恭惟太

上皇帝陛下赤符受命黃屋非心兆民蒙偃武之恩三

紀獲崇文之效太上立德存誠踐履於義經天下歸仁
盡性兼同於堯帝鴻名賓實縟典流光臣退處丘樊遙
瞻霄漢臚傳金祀驩呼興慶之班壽介玉卮趯趯未央
之舉臣無任

賀太上皇后加尊號牋

瑞集慈庭冊尊坤極照臨所暨拊蹈則同

中賀

恭惟太

上皇后殿下邇日合明歌風播德堯天齊壽增巍巍蕩
蕩之名舜子承顏鄙洩洩融融之樂徽稱三進鉅典一

新臣身伏故鄉耳聞熙事葵傾四海漫馳存闕之心花
覆千官莫接呼嵩之武臣無任

賀皇帝表

慈闈受祉丕冊垂鴻聲教所覃耄倪同慶中賀恭惟皇
帝陛下業隆再造德煥重華武能廣文之聲益揚躋蹟
舜盡事親之道屢講緝儀瑞溢堪輿事光竹帛臣久違
軒陛遠在丘園二聖重歡何取中興之頌八音迭奏莫
陪上壽之班臣無任

太上皇帝慶七十賀表

作之君作之師邁百王之高躅得其位得其壽問七秩
之耆齡解澤流行龐眉呼僊中賀恭惟太上皇帝陛下
垂裳二紀脫屣萬幾授舜子以無為邁堯天而兼覆講
玉卮之禮自古所稀計銅狄之年於茲為盛臣迹儕野
老心慕封人敢賡茂栢之詩仰介大椿之祉臣無任
太上慶七十賀皇帝表

慈闈得壽饗踰七望八之耆年縣寓臚驩逢咸五登三

之盛際願今之慶振古所無

中賀

恭惟皇帝陛下協帝

重華繼文下武奉兩宮之溫清閱五閏以尊安堯蕩蕩
無能名益介大椿之祉舜業業致其孝獨光汗簡之藏
臣身在鄉闕心馳軒陛想雲龍之縟禮花動春幡覩雷
雨之渥恩茶開秋網臣無任

謝慶壽加恩表

慈極從心講後天之大慶周行拜手霑加地之新恩却
偃僂之虛文垂登閱之故事

中謝

恭惟皇帝陛下以堯

為父如舜事親長發其祥應七百卜年之神筭多與之
邑記二三執政之舊人特出明綸以彰盛典臣退藏故
里阻相祲容既井賦之濫增顧涓埃之何報臣無任

賀會慶節表

地闢天開際就盈之良月星流電繞書衍慶之非煙凡
在式園率同擊壤中賀恭惟皇帝陛下聰明稽古慈儉

宅尊息戰闢以邦寧勸農桑而家給稱玉卮之萬歲若
舜事親上金鏡之十章與唐比迹烜赫誕彌之節歌呼

難老之謠臣久去宮庭遠藏巖壑首百僚而上壽夢想
鵷行足五帙以增年驩均鰲抃臣無任

賀立皇后表

雲祀臚音星軒綯彩凡依乾覆共仰坤儀

中賀

竊以詩

首闕睢吟咏二南之化禮稱禴翟辨明六服之容惟嬪
虞以媯汭之賢故翼夏者塗山之懿倚歟盛旦倬彼芳
塵恭惟皇帝陛下景命中興容光下濟杜私謁以肅房
闈茂內德而御家邦觀法大任得嗣徽之太姒承顏長

樂當正極於長秋喜動慈闈慶垂寶冊臣身藏田里心
係闕庭椒塗既進於鴻名蘭館願修於故事臣無任

賀皇后牋

慶溢楓宸禮成椒屋共賦覲天之雅仰瞻邇日之明恭惟
皇后殿下播德鞠衣流光彤管繇良家八月之選冠天極
四星之躔周之興也以太任續前塵於昔日葛之覃兮於
中谷助內治以歷年茲正位於純坤益盡懽於長樂臣退
藏三徑仰睇九垓想奉冊以馳心敢貢牋而拜手

謝加恩表

八觚展采職弗預於奉璋四表均釐渥遂儕於賜昨華
章所逮朽質為榮中謝恭惟皇帝陛下降札先庚燔柴
報本六變陶匏之樂五修黼黻之祠移慈極之孝心事
天明而事地察受泰壇之靈貺如山壽而如川增澤欲
廣於下流福靡懷於專鄉致茲多邑猥及微臣敢飾詐
以循牆第銘恩而存闕臣無任

賀明堂表

大饗總章慶合祛於天地傳臚象魏鼓丕號於雷風凡
在式圍率皆擊壤中賀恭惟皇帝陛下化行禹貢德邁
舜華五陟圓壇疊黃鍾太簇之樂一新曠典續皇祐紹
興之秋服位森羅簋實豐潔夙駕有霖淫之害齋宮開
明概之祥聖格三靈歡來四表臣心休尋壑身阻陪祠
記曩歲之執綏依乘玉輅想蕭辰之鳴佩瞻仰金雞臣
無任

遺表

丁酉年病中所作
後七年而公薨

去天一紀每嗟遇合之難問路九原少駐斯須之景

中

謝伏念臣學雖是古材不逾人蚤從事於麓官敢纓情

於好爵初無介紹獨被簡知立朝曾不二年輔政乃周
十月不敢懷姦而罔上但欲奉公而減私犬一吠形歷
數秉鈞之罪言三成虎不無投杼之疑旋畀輔藩久安
祠祿園林勝而鐘鼓絕阡陌少而子孫多家無餘財不
留心於斯事人有百行顧沒齒以何稱伏望皇帝陛下
信任忠良聽從諫爭承顏盡孝以驩壽考之無疆嘗膽

復讎少俟邊庭之有釁臣受恩弗報齎恨奚言尚期結
草之忠用展傾葵之素臣無任



盤洲文集卷四十



總校官進士臣胡榮

校對官編修臣方燁

謄錄監生臣蔣予林

欽定四庫全書薈要

集部

盤洲文集卷四十一

四



詳校官助教臣謝登雋

欽定四庫全書薈要卷一萬五千七百九十一

集部

盤洲文集卷四十一

宋 洪适 撰

章奏一

論人戶差役劄子

除江東提舉上殿

陳三
國侯
覩元祐中旨揮合役空閑人戶不及三番處許令雇募蘇軾上言謂聖恩欲使百姓空閑六年紹興二十六年六月一日續降旨揮批朱者歇役止於六年便與白脚人比並再差行之數年民受其利近因宣州一鄉

上戶絕少下戶極多守臣奏請本欲不候歇役六年即再差上戶有司看詳誤將歇役六年旨揮便行衝改遂致上戶却稱朝廷改法是以鼠尾流水差役必欲差遍白脚始肯再充當差之際紛紛爭訟下戶畏避多致流徙蓋上戶稅錢有與下戶相去百十倍者必俟差遍下戶則富家經隔數十年方再執役臣前守徽州且以婺源一縣言之有差及一貫稅錢者民間哀訴誠為可念臣愚欲望聖慈將紹興二十六年旨揮依舊施行庶使

細民鼓舞德澤取進止

貼黃 臣謂役法全在守令得人若付之胥吏則舞文生弊不可勝言今若施行歇役六年旨揮亦有合關防事件謂如一郡之內上等五戶稅錢五十貫中等五戶稅錢三十貫各曾應役下等戶並稅錢五貫以下係是白脚若以歇役六年再差稅錢在上之人却恐中等五戶僥倖再差不及如有似此去處乞令自第一戶差至第十戶然後再差第一戶所貴役法

均平上下稱便

乞勿繫大獄干證人劄子

臣仰惟陛下哀矜庶獄視民如傷丁寧欽恤前後曲盡而州縣之吏未能盡體好生之德不無冤滯以干和氣臣伏見諸縣徒以上罪雖有結解期限而吏胥利於追逮求覓或一年或數月始以解州又數月或半年方能結案或囚徒番異則又未可預料其囚以身犯法禁繫固宜獨是事發之處或在邸店或在道路一時偶與相

逢之人見其鬪毆死傷便為證左相隨入獄雖供責已具而獄吏或以無保識或以別州縣慮其再追不至例皆同拘牢戶同解本州直候結案無番異方得釋放蓋證左之人多是他州商賈與村落農夫或有老親弱子別無他丁必候其人營販作業始可生活一遭禁繫動綿歲月其家啼飢號寒遂擠溝壑其身或苦疾病因而瘐死無罪隕命深為可憐臣愚欲乞聖慈嚴下州郡應諸縣所追證左若供責已具限一月先與召保知在或

村落農夫在市無人保識即令押下本都知在或他州
縣人即傳押付本土隨其鄉部召保施行皆不得別為
苛留聽令從便經營日食若罪囚到州辭情異同或移
獄別州鞠勘必須再追證左並委長吏取緊要人量行
點追如或違戾常令提刑司覺察按劾重寘於罪提刑
失察者諸司互舉之庶使無辜之人不致久留縲紲其
家不致窮餓就死以副陛下愛民止辟之意取進止

乞許逃業子孫贖產劄子

紹興三十二年
建康上殿

臣伏見頃歲江鄉之民多因荒旱遷徙淮甸比遭敵騎之擾復還故鄉而所棄祖產皆為官司估賣雖欲復業已不可得扶老攜幼茫然無歸所謂田園悉移於形勢之家但用低價計會十不償一至有指名投狀請佃入已而量輸稅租者於官既無所得於民乃有深害徒以惠兼并力勢請託州縣之人揆之物情未見其可仰惟陛下聖德仁恩光被四表惜怛忠厚之意拳拳為民蓋已度越漢唐況於凋瘵流徙之餘僅存軀命王政所施

莫此為急臣愚欲乞睿慈下諸路揭榜斷自紹興二十八年以後凡州縣所賣逃產如元業人及其子孫願以元估官價就贖者仰即日寄庫納錢給據還產如係承佃者並行給還其牛種之類係買戶續置者則還其主如或怙強恃勢尚復非理執占州縣徇情遷延不為理取許經朝廷越訴仍專委提舉常平官覺察奏劾如有犯者必罰無赦庶幾垂盡之民仰霑德澤不致轉擠溝壑以副陛下視民如傷之意取進止

乞罷諸路抵當庫劄子

臣竊謂戎車既動支費倍增賦入有限生財極難納粟入官旨揮今已半年縣邑至有計苗一石歛錢一千以資貼上戶者酒坊預借亦將半月州縣多有追呼鞭治留之縲紲者而江東一路方得十一萬緡生財之難如此臣伏見諸路常平抵當毋慮百萬貫始欲輕息利民而出納者邀留需覓得之不時故民間不復與官為市率皆官吏作弊以麤惡之物抵質高絀久而不取遂成

失陷所存見緡又掌之者那允侵借今江東一路共有
本錢十五萬貫而所名息錢纔二千餘貫臣愚欲乞睿
慈將諸路抵當庫並行減罷所有見在錢物限日下盡
數起發如有侵兌並勒填補庶幾少贍軍旅之費取進
止

乞添總領江浙財賦字劄子

任淮東
總領日

臣聞名不正則言不順言不順則事不成臣所居官以
淮東入銜而置司鎮江府所拘催錢米並是江浙諸州

向來只有鎮江一軍則元科撥錢米足可支遣自用兵
以來淮上增添宿衛軍馬及李寶一軍並是鎮江總領
所應副雖蒙朝廷科撥錢物而州郡頑慢官吏各以不
相臨統藉口視文移為故紙公然占恠不以軍事為意
雖朝廷屢有指揮許按發違慢去處及浙西官亦許通
行薦舉但官名未正終是號令不行且以李寶及宿衛
司所屯淮上軍馬計之每月所費錢二十萬貫米料四
萬石截日終已那充支發過錢壹伯萬貫文米料一十

六萬石而所科撥諸處錢物但有平江府發到錢一萬貫文常州鎮江府發到米六萬石錢一萬九千貫其江東諸郡月椿錢並不按月解發已拖下五十萬貫臣切恐秋冬之間或邊塵未息淮上必須增戍若不預行椿積則緩急之際無以措置如江浙州郡玩習弛慢無所忌憚必致失事臣已條具州郡少欠數目申尚書省乞取旨行下令如期起發外臣愚欲乞依鄂州總領官例於銜內添總領江浙財賦四字所有違慢去處乞依前

後已得指揮將當職官奏劾取旨重行黜責人吏即追呼斷勒其他事件只乞依元來已得申請更不敢別有增添陳乞庶幾官名既正可以督責應辦不致有悞軍期干犯宸嚴俯伏俟罪取進止

乞令漕臣備辦餽運舟船劄子

臣伏見諸路總領官只以科撥為職其餽運之事則漕臣所掌自海州被圍內外闕食所運錢糧淮南漕臣則以殘破之後舟楫未辦為辭隨軍轉運又稱官係浙漕

不能於淮東辦船為辭並要臣本所徑行津運臣以駑
鈍之材誤蒙使令不敢避事曠職到官數日間節次起
發米四萬石錢九萬貫銀二萬兩馬料一萬石並是臣
措置舟船般運徑到楚州鹽城縣交卸入海所發綱運
有在運河阻淺者又親到揚州尋雇客船盤減前去其
泗州軍馬錢糧亦有臣本所綱運徑行裝運至軍前者
目今遇他州綱運到來未敢下卸逐急可以勸諭令渡
江前去應副急闕當閒暇之時一方用兵津運已是費

力竊恐秋冬之間兵革未息饋餉愈多如臣本所有綱船可以撥發及客舟可以用臣自當體國同共津發若他州別有綱運到來漕司仍前推避盡要臣本所津運必致有誤軍期臣愚欲望聖慈嚴切行下淮東漕臣及隨軍轉運令先期廣辦舟船以備將來餽運不管推托致令誤事取進止

過江催發米綱劄子

臣被受今月二日聖旨處分海州軍食事臣雖已科撥

米斛過江竊慮入閘之後或舟大水淺無船盤減官司
不着緊催趕依前留滯有悞軍前指準臣遂於次日躬
親過江至瓜州方見齊僉武珙綱相繼入閘及到揚州
根刷得朱實張受兩綱米壹萬一千石各已於今月三
日以前經過前去外有張球梁平兩綱共米一萬一千
石內有一船裝二千石者阻淺在城內撐駕不行臣遂
面見向子固即時措置尋雇到客船二十一隻共五千
料用一十三隻盤減臣隨行支與地理雇錢三百餘貫

仍更支錢一百貫文付兩綱押人添助其他篙梢口食

差使臣吳弼坐押已於初七日申時起離揚州訖尚有
用不盡船八隻存留在岸已移牒強友諒候後綱有阻
淺船隻即行盤減星夜趕發前去有轉運司差幹辦公
事周伯駿前去鹽城縣措置海船臣訪聞前任知縣龔
尹曾有官造多槳船二十餘隻及裕口羊家寨有海船
數十隻臣已令周伯駿訪存在詣實勸誘使臣緣本所
見計置張子蓋軍馬合用錢糧并據楚州申張玘人馬

亦已到漣水縣合要科撥糧食臣若更行起發至前路却恐妨曠本職已於初八日巳時回歸鎮江府訖取進止

過江措置津運劄子

臣今月初五日戌時准今年五月二日尚書省劄子節文為海州被圍諸軍闕食等事五月二日三省同奉聖旨令洪适龔濤強友諒體認軍期急闕火急科撥躬親措置津運星夜前去如少有違悞當重寘典憲人吏決

配仍具已起數日日時聞奏臣昨於四月十九日被受
省劄奉聖旨除淮東總領臣於二十日起離池州至當
月二十六日到任交割職事聞海州被圍慮恐軍士乏
食即時檢索山東糧運案牘理會緣自海州被圍以後
未見隨軍運副龔濤移文措置般運雖前總領官徐康
撥下張受朱實兩綱米一萬一千石令往楚州鹽城縣
分付龔濤津運入海尚未離鎮江府岸臣深慮糧食不
繼海道或阻風濤不可預期遂再於四月二十八日根

刷得新到宣州廣德軍張球梁平兩綱并四月三十日
齊旆武琪續到兩綱通前六綱共計米三萬三千五百
九十石節次前後差使臣丁用獄子王恩管押過江牒
淮南運副強友諒再差使臣催趕至鹽城縣交付龔濤
津運入海如有綱船重大運河淺澀不能通行即令用
小船般博據強友諒五月初二日申巳交割得張受朱
實張球梁平四綱差使臣朱德催趕前去訖今所准聖
旨指揮令火急科撥躬親措置津運臣今再於鎮江府

發馬料一萬石及改撥宣州呂青押到米一萬石前去
應副李寶諸軍食用外臣躬親渡江催督漕臣同共趕
發別具奏聞次

支解圍軍兵犒設劄子

臣恭准聖旨令倍支海州解圍軍兵犒設及節制軍馬
行下支散宿衛前軍回歸人犒設一次臣取會到本軍
見管五千一百六十人其四千七百四十三人係同張
子蓋到海州解圍其四百一十七人係在楚州不曾過

淮之數臣將到海州人倍支在楚州人各支一次犒設
臣昨聞今春所犒軍士有統將隱沒不霑實惠者致使
介胄辛苦之人不無怨望又有增添冒濫之弊臣遂堆
垛錢糧在鎮江府丹陽館諭統兵官分列隊伍臣躬親
就館逐一點名當面支散雖自來犒設例是折銀臣竊
見軍士暴露之久當此隆暑班師道過鎮江不能久留
若得銀子倉卒難賣見鏹無以應急使用臣輒將軍兵
三貫以下犒設之人盡支見錢其使臣三貫以上者即

以分數支折兼鎮江府前軍右軍太平州武鋒軍先係
遣發應援海州被圍在城及張子蓋到城下其前項軍
馬並皆出城同共追襲立功今各同張子蓋大軍回歸
雖五月二十四日旨揮未曾該載臣輒行比附倍支訖
欲望聖慈特賜指揮施行

盤洲文集卷四十一

欽定四庫全書薈要卷一萬五千七百九十二

集部

盤洲文集卷四十二

宋 洪适 撰

章奏二

招安海賊劄子

今月二十七日據海賊徒黨丁十二潘成陳十二賁到
頭首人殿前司遊奕寨効用王先等狀稱各有老小無
所供給兼為請受不平逃走鄉下作買賣為活為見官
司收捉緊急難以存居因而往海同百姓一行人船只

借過往船隻米糧供給口食即不曾劫盜官司物件先為見今年四月內得蒙都督相公鈞旨差出朱清訓練張弼秀才沿海招安作過之人仍賁本府黃旗一面上書江淮都督相公招安在海作過人船并榜文沿海處貼掛是先於今年五月十八日在海洋行使舟船到地名洋山收取水漿喫食只見土豪陳立舍前貼掛榜文係是江淮都督相公鈞旨招安榜上稱說日前在海作過罪犯一切不問是先當時收榜上船說諭衆船首是

江淮都督相公有榜招安船衆人伴即便依隨先等有船一十隻計八百餘人當日行使舟船到大七洋內仍見諸處寨下官船不計其數隨後趕捉先等船隻至晚昏夜失蹤各自分散不知衆船下落先令賫押人船二隻面濶一丈八尺計一百六十餘人船上有軍器家事等投獻都督相公府充水戰軍前使用先船內有老小單身難為看管乞差本府訓練官前來沿路管押人船到府叅候指揮臣以事非本職不敢輒受令徑詣都督

府投狀其人云在明州時便有意招安但以路遠難通
來時船主令抱狀投告總領恐前途艱阻身到行府不
得乞總領所差人管押人船前來不願官軍同去臣憐
其來歸却恐軍將貪功妄行擒捉遂受狀差人押兩名
取船押一名往都督府方欲遣行之間忽云一人在路
為水軍所擒一人以此潛匿不敢出臣恐其猜畏舟復
藏避遂請到水軍統制馮湛詢問事因馮湛云海道與
賊船十隻相值獲其三隻追五隻至明州洋沉船而遁

其兩隻不知下落今所投即此兩舟是日馮湛管押捉到賊黨入城在路逢見同伴一人遂行擒下馮湛既押所擒一人到臣官舍所藏人亦隨後前來臣遂喚三人到馮湛之前馮湛欲借船一隻管押兩名前去取船其人云只乞總領差人自行駕船限在來日到岸馮湛見其言如此遂稱更不前去臣所慮官軍利其財物別致生事或賊黨驚疑移舟他往遂更不令馮湛管押又慮其人反覆再三以美言啗之云汝輩多因商販折本無

路得食不得已求生國家愛惜人命本無殺意番人投降尚自各與官職多方存卹況汝皆是本朝人民都督府已有旗榜招安汝輩遠來自投定作好官不須疑慮更生他心其人拜謝臣各已犒設即差本所使臣任慶同兵級三名管押潘成陳十二前去取船及差人管押丁十二前去都督府臣候船到即親至江頭拘收軍器以錢物酒肉等第犒勞令鎮江水軍差人防邏聽候都督府指揮臣候船到別得具奏外

第二劄子

今月二十九日酉時本所差去使臣承節卽任慶取押到招安人王先海船二隻到岸船面濶一丈七尺在船首領以下一百四十七人內五人元係軍身餘人並係溫台州等百姓各是少壯惟王先稱願充水軍使喚其間多有驅虜到人已申取都督府旨揮或行揀放或候防秋事畢發遣臣逐一撫存犒設錢米酒肉差鎮江水軍防護不致生事其船欲到鎮江府數十里外逢見都

督府總轄福州海船使臣王城硬將旗榜令受本人招
安拘攔占奪不肯放行臣親至江頭差撥水軍步將范
淳西津巡檢劉憲文及弓兵等人六次催取方始發遣
前來其船內有紙甲一百一十副槍刀弓弩旗鼓等軍
器共一千五百六十八件並係王城強奪前去見行追
取所有逐人單名器甲細數已開具申三省樞密院

第三劄子

臣准都督府劄子令將海船王先虜到人放令逐便臣

今月三日躬親至江頭喚齊在船上人逐一審問數內
孫元等二十七人各乞歸鄉再令王先審辨稱係是新
近虜到之人即非元來徒伴並各供責文狀臣已支散
錢米出給公據放令逐便訖其見在人除首領三十三
人外其餘梢工水手八十五人雖亦有係虜之人緣在
賊中日久各自欣然願充水軍並皆強壯臣見行差人
管押前去樞密使行府聽候指揮

會計軍儲劄子

臣契勘淮東分戍諸頭項軍兵及新到步軍司人馬除就鎮江支請外月用錢十二萬七千餘貫米四萬石馬料六千石臣取會到諸州見管數目筭計至九月十五日終泗州有樁積米七萬石未係支遣之數海州有米四萬六百石可給軍食一年有錢銀會子五萬貫料七百石可支一月諸州共有米十四萬四千石可支至十二月終有錢銀會子二十七萬貫可支至十一月中旬有馬料七萬七千石可支一年並係臣本所節次改撥

前去緣鎮江倉庫目今儲積及諸州未到錢米並皆不
多難以預樁淮上七月之費今等待續到綱運及那減
鎮江錢米趁未閉閘起發過江淮備歲前支費必無少
闕所有來年軍用如遇閉閘則依去年例候江東綱到
就撥往瓜州卸入新倉令淮南漕臣宋曉措置建運或
綱運不到則令陳漢用浙西舟船將鎮江錢米運在瓜
州津發所有漕運必不致有誤軍期但軍前非泛支用
並是就支大軍錢物不可指約臨期旋行措置科撥伏

乞睿照

戍兵請給驅磨阻滯劄子

近准御前劄子戒敕幫勘戍兵借請因驅磨欠剩阻滯
事臣已即時取到糧審院狀奏報訖臣尚懼聲說未至
詳盡仰勤聖慮臣契勘鎮江諸軍出戍自來不曾借請
亦不分擘券厯每遇差出卽都統司量遠近以人數移
文總領所預勘兩月或三月錢米每軍逐將攢類姓名
造成券旁發到糧審院即時批放或出戍日久則又接

續再勘除月糧米折麥錢并新添錢米存留養贍老小
外其預勘銀子及公據係出軍之日就鎮江一頓支請
轉變錢物置辦路費及分留贍家其二分見錢及口食
米即就軍前逐旬支請至次月全軍過勘大厯本將即
以出戍人預勘過錢米自行按月回落及軍馬還歸逐
月隨衆勘請若回歸在預勘月分之內則以熟旁改界
就鎮江支請更無合併驅磨及回納不該欠剩等事與
他處軍馬體例不同或遇起發急速本軍造券不及臣

尚有先次借支應副者不敢使之怨望失所伏望聖慈
特賜睿照取進止

論招軍之弊劄子

隆興二年自淮東
赴行在供職上殿

臣竊謂自古大有為之君志先定則事必成然而事貴
乎成不貴乎速高宗伐鬼方三年而克之越王至於二
十載然後刷會稽之恥方策所書明驗可考今日中興
之事非無機會然而未遂恢復之功者豈以兵未強而
財不豐耶臣世受國恩無以補報幸獲進望清光不識

忌諱輒以本職而進狂瞽之言伏望陛下赦其罪而聽之臣伏見今之士卒老疾幾半今之錢穀枵竭可憂軍兵日得百金分其半以出戍既不能給其家又不能餬其口邦用無餘難以增益臣愚欲乞選從臣銜威命徧至諸軍汰其老疾計所減之數量均百金之人庶其驩心踴躍銳氣增倍或謂兵貴虛聲何自苦而示寡此徒自欺爾又諸軍之籍虛偽相仍今既未能一洗舊弊則新弊不可不革軍效湮刺其來已久掌兵者尚猶盜羸

餘以為田宅之資苞苴之奉况蕩然不加繩察乎效用
日得之鏹三倍於兵故近年應募為兵者甚少而為效
用又不刺手雖有臣寮申請而將帥不復遵行姑以揚
州帥司言之所謂效用陸百拾肆人歲費大農錢幾柒
萬緡米陸千石但能挾弓負劍助帥臣騶從爾又鎮江
大軍一日發營中子弟數百輩唱名於總領所便入武
勇伍中若今日稱甲明日稱乙何以辨之臣愚欲乞先
降詔旨赦其虛冒之罪命所遣官凡未刺者俱刺之淮

郡所招今都統司擇偏裨分掌每滿百人則行撥隸而兼聽所招帥守節制仍乞在內則承旨司在外則總領官季以新招之數申上有違新降三七分招軍旨揮必罰無赦如是則兵可習而強財可省而豐此而不革則軍籍益偽國費益屈無以善其後矣伏望聖斷謀之大臣盡革積習之弊庶幾千慮一得少副陛下中興之志干犯宸嚴臣不勝萬死

論東人來歸事宜劄子

臣嘗委曲詢訪東人來歸之故或亡命山澤為彼指名者或仍年旱蝗不能捄飢者或親故南來牽連誅誘而至者其人蓋以無兵及衣甲不可饔強悍之鋒故欲藉王師歸雄其鄉報復剽掠申其素志然扶老携幼流徙失業口累之衆者衣食不能自給間有所携皆輕價以售之貧者則三五為羣收拾棄菜於巷陌之間官雖計口給粟一家不踰五斗兵將又或折辱恐無以固結其心近者鎮江有裒錢買舟欲逸而獲者臣慮其日夜企

而望歸迫於飢寒計出無聊乘隙伺便反以為害欲望
聖斷思患豫防參酌漢五屬國晉宋僑置郡縣之宜專
設官吏使之各有司牧懷我樂土不致蜂蠆作於懷袖
天下幸甚取進止

納供軍綱目劄子

臣駑鈍無庸誤被使令總軍賦於江淮之上值師旅增
益財用窘闕黽勉二年僅逃罪戾今蒙恩歸班凡供軍
之事不敢枝蔓吏文以瀆乙覽敢刪取綱目為要略一

編納之閣門伏望聖慈俯賜宣索取進止

轉對劄子

臣准御史臺牒輪當今年五月一日視朝轉對須至奏聞者右臣仰惟陛下踐阼以來務崇儉德始講郊丘之禮專以誠意交神塞明車輿儀衛下至官吏賜予率從撙節臣職在太常不容箝嘿切謂古今不相沿樂金石八音不入時俗之耳故通國無有習其藝者而聽之則倦且寐獨以古樂用之郊廟爾昔者等工鼓員不應經

法者孔光何武蓋嘗奏罷於漢代前史是之今所用鼓吹警場諸工凡一千一百五十有九人有司已乞三分減一獨是肄習踵例尚存九十八日夫驅游手之人撻金擊石不當律令顧亦安能使鳳儀而獸舞而所用日給之鋸為緡一萬三千三百有奇誠為虛費臣愚欲望聖斷只令肄習一月亦可以成聲中節不致闕事殆省費之一端也謹錄奏聞伏候勅旨

禮部論王振服色劄子

臣契勘本部見行右宣義郎致仕王振乞引用覃恩改轉服色事朝廷送下指揮據本人元係靖康元年於客人處買到代州納白米空名將仕郎補帖經開封府書填續因男修武郎王洙遇恩累封至宣義郎昨來吏部勘當檢准紹興十三年旨揮納錢及六千貫之人許行注授無人願就殘零闕據本人齎到紹興七年行宮吏部告示照得係納錢及六千貫之人依前項旨揮合行出官某切詳所繳行宮告示係本人自陳稱有朱鈔見

得納米價錢當時吏部為無元書填官司申狀及公據
令依去失法召知識官二員委保方許參選本人一向
不曾召保到部若使可以注授殘零窠闕出官必無緣
陞改至承務郎以上可以該得服色恩例所乞難以施
行取進止

盤洲文集卷四十二

欽定四庫全書薈要卷一萬五千七百九十三

集部

盤洲文集卷四十三

宋 洪适 撰

章奏三

同周操殿院乞對劄子

臣等今月二十一日蒙宣赴便殿面奉聖訓令討論環衛官制臣等今將祖宗典故及唐初十六衛參考條具粗備臣等二十九日係輪當學士院入直欲望聖慈特賜宣召許令面奏開陳因革事宜伏候勅旨

討論環衛官劄子

臣等面奉玉音討論環衛事今將國史會要及唐制參酌畫一在前竊計本朝踵前代設環衛官太祖太宗朝常以處將帥及降王之君臣自後則多以皇族為之故三朝國史以為官存而事廢在熙寧中曾令邊將充攝在天禧中亦曾令內職兼攝只是充補班列而已嘗聞靖康初以外戚正任官俸祿太優令換環衛繼以俸薄為言遂復仍舊雖兵火之後旨揮不存而朱孝莊制詞

可以考驗仰惟陛下聖慮宏遠修飭戎備欲擇赴赴之
臣置在左右叩其智謀觀其技藝以備將帥之選甚盛
舉也臣等以謂國朝自有設官之名不必遠取唐制太
祖太宗故事蓋可法則今若徑行換授則恐有減俸之
患欲乞只令如閣職兼帶若節度使至刺史則帶上將
軍橫行遙郡則帶大將軍正使則帶將軍副使則帶中
郎將又以下則帶左右郎將各分等次給與職錢如得
允當所有官府吏屬請給人從等事乞令吏戶兵部同

共相度以備採擇

一唐制十六衛之將軍各一人從二品大將軍各一人正三品將軍各二人從三品掌宮禁宿衛之事長史各一人從六品上掌判諸曹廩祿軍團等事親勲翊三衛凡五府中郎將各一人左右郎將各一人校尉各五人每校有旅帥二人每旅有隊正二十人武德貞觀世重資蔭自二品至五品子孫分補三衛又有諸曹參軍及司階中候司戈執戟

謂之四色官

一檢照國朝官制有左右金吾衛左右衛左右驍衛
左右武衛左右屯衛左右領軍衛左右監門衛左
右千牛衛凡十六衛各有上將軍從三品大將軍
正四品將軍從四品中郎將郎將長史等官按三
朝國史云官存而事廢蕃酋官舊有歸德懷化大
將軍將軍郎將司候司階司戈後又增保定清遠
奉義歸義廣化之名將軍以下又有武寧安化奉

華保順之名又有寧遠安遠保安保寧大將軍懷德奉化將軍懷忠武安郎將保忠司候保和保信司階順化安德司戈皆以蠻夷朝貢受官者充

一俸祿之制上將軍六十貫

皇子則一百貫

金吾大將軍三

十五貫諸衛大將軍二十五貫

皇親則六十貫

將軍二十

貫

皇親則三十貫

中郎將十三貫

一中書備對該載宗室諸衛將軍換武者換諸司副使紹興法該載環衛官換贈凡諸衛上將軍換節

度使凡遙郡團練使諸衛大將軍換遙郡刺史至武義大夫諸衛將軍換武翼大夫至武義郎

一建隆元年以登州團練使李萬超為大武衛大將

軍前均州刺史潘文通為右驍衛將軍前

關州刺

史韓召為左領軍衛將軍其後石守信張凝石曦

焦繼勲劉重進仇超白全紹翟美王暉陳守習等

皆為諸衛將軍除授者不絕亦有除環衛官致仕

及外任者事具實錄

一太平興國二年四月安遠軍節度使向拱換左衛
上將軍制詞略曰王者念宗社之重思將帥之賢
內外迭居以均勞逸安遠軍節度使向拱等事我
先帝時惟寶臣入則參帷幄之謀出則奉節旄之
寄粵予冲人聲承丕業豈敢以藩鎮之任重煩舊
德也式罷藩宣之寄俾昇環列之榮拱永德並可
左衛上將軍美可左驍衛上將軍廷遜可右驍衛
上將軍先時張永德帥鄧張昊帥滄劉廷遜帥澶

至是皆罷節制歸環衛其後祁廷訓韋縉

闕

周勳蘇誨等除授亦不絕但比太祖朝極少事具

實錄

一天僖元年御史臺言常朝武臣止一二人或請告則絕班欲乞增補詔以莊宅使慕容德琛為右監門衛大將軍西京左藏庫使孫正辭為右領軍衛將軍崇儀使劉守節為右屯衛將軍染院使韓景祐為右監門衛將軍供備庫使宋可言郭仁浦為

右千牛衛將軍

一嘉祐二年以未有差遣諸司使攝大將軍月支食錢七貫副使崇班攝將軍月支五貫候有差遣別差不得過二十人

一熙寧三年詔今後南班有關差陝西河東替回曾有戰功路分都監至知城堡寨崇班已上充攝如不足即於見在樞密院知州軍路分都監已上得替未有差遣人內差攝事並具會要

一中書備對該載元豐二年十六衛大將軍二百九十四員將軍一百六十二員並係宗室

一紹興十一年右金吾衛大將軍朱孝莊換觀察使制詞曰仰惟淵聖皇帝即位之初監於先王成憲進讀之臣有言今之節度使古之諸侯也近時庸人孺子或以恩倖得之於是凡外戚之居正任者易畀環列侍衛之名雖號者能率遵明訓朕乘興運事異前朝義有當然賧非勲典右金吾衛大將

軍提舉洪州玉隆觀朱孝莊乃欽成兄弟之子靖
康中宮之屬謙恭毋怠忠信自持通練老成見推
四姓恩厚於爾匪曰予私爾縱毋言朕志已定其
復庶車之秩以為戚里之光可汝州觀察使

有撰述文字乞奏對劄子

檢會本院見行一司條令內一項翰林承旨學士職當
撰述代予王言事體繁重合有上稟睿訓文字若循習
舊例俟閣門引班顯見稽緩今後仍許先次挑班上殿

今來臣係太常少卿兼權直學士院有撰述文字合行
奏稟欲於令月四日上殿敷奏緣臣係卿監官難以徑
牒閣門伏望聖慈特降睿旨令閣門依本院故事引班
上殿奏稟伏候進止

乞改定樂章劄子

臣據太常寺申乞修潤將來郊祀大禮樂章各已修撰
進呈徽宗皇帝酌獻一曲係紹興二十八年光堯壽聖
太上皇帝親製其間如烈考合改作烈祖及其他詞句

亦有當改定去處依故事係請御製改定今錄連在前
乞賜聖裁修改降付學士院施行取進止

乞進胙德壽宮劄子

臣竊考禮經古者大夫攝祭君不親行則當歸胙而諸
臣祭其家廟及都家祀其山川亦皆致胙於君謂之致
福載在周官則都宗人家宗人掌其事祭僕展而受之
膳夫受而膳之後世禮文多有廢者仰惟陛下以聖繼
聖盛德重華慶超古昔初講郊禋之禮謂宜進胙慈闈

並受帝祉臣妄進瞽言欲望特賜聖裁如或可採則乞
旨揮有司草具儀注進呈取進止

論郊回用樂劄子

臣勘會今歲郊祀大禮依逐次典故用儀仗鼓吹已赴
警場振作所有禮畢車駕回鑾導引振作亦合用軍樂
端門肆赦所設宮架係合用雅樂並與燕樂不同難以
一例不用伏乞聖裁特賜處分取進止

乞減樂員劄子

臣伏覩紹興二十八年郊祀用儀仗一萬五千三十人鼓吹警場一千一百五十九人八音二舞樂工四百五十九人近降旨揮儀仗減半臣前曾申請鼓吹警場人已三分減一舊例樂工及鼓吹警場人肄習九十八日臣又曾具奏減作一月所有樂工凡二百六十人太常有籍三十六人有月給錢糧所闕一百六十六人旋行招補至肄習之日日支食錢四百文尚有招未足人數緣竄名籍中可以規免臨安府行鋪名役不無計囑之

弊臣再行研考除登歌壇上樂四十八人二舞九十人
不可減外壇下宮架二百七人今欲減省六十七人凡
琴二十人十人可減瑟十二人六人可減笙二十人四
人可減簫十人六人可減笛二十人八人可減篪十二
人六人可減塤十人四人可減歌二十人四人可減鐘
磬四十八架十六架可減分詣九宮貴神太社太稷給
祠一百十四人四十五人可減既減員得以省費而於
事神之禮初無所闕更乞聖裁取進止

乞刺壯健乞勾人劄子

臣伏見臨安府街市間乞勾人頗有壯健者恐是盜賊
徒黨託此為名以伺察人家之貧富門巷之曲折今輦
轂之下時有剽劫之患不可不曲為之防臣愚欲乞睿
斷行下臨安府選委官屬因賑濟之時鳩集乞勾之人
盡皆揀擇如非老弱疾病其人可用即與刺充廂軍既
免其啼飢號寒之苦若使有穿窬之志亦可使滅心鑠
謀矣輕瀆宸嚴臣不勝戰懼取進止

乞措置海道劄子

臣伏見淮上斥堠不明將帥無申發文字敵騎渡淮經涉七日朝廷方知今已據楚州若分兵取他道潛攻通泰朝廷亦無由得聞所慮自彼過渡便近平江兼恐海道不防賊船來往今平江別無重兵守臣又已被召李寶水軍稀少緩急難以倚賴伏乞特留聖慮過為隄防干犯宸嚴臣不勝惶懼取進止

乞降親征詔書劄子

十一月十三日

臣十一日面對曾具奏陳乞降親征詔書激勵士卒至今未奉處分所慮敵人已入淮南兩軍相持以日為歲若非戰勝無以使其革心所有詔草輒敢冒瀆天聽若或施行乞許臣錄呈三省別行進入其間敘述聖意未盡去處更乞處分取進止

進視師詔劄子

臣伏奉御筆改定視師詔臣再有愚見增減數字各已貼說欲候進入盡降竊慮稽緩輒已擅行書寫大字詔

本若蒙聖意賜允即乞徑付三省樞密院如有未當即乞再賜御筆批抹付下臣不勝死罪

請祠劄子

中書舍人

臣不避誅戮冒犯天威伏念臣與湯思退舊不相識思退以臣叨中詞科在其前嘗遭秦檜無辜廢錮連蹇在外二十餘年所以召臣入朝供職臣既猥居卿列攝事翰苑疊因宣召誤受眷知遂蒙親擢寘之從班臣方念糜捐無以圖報乃聞談者指為思退之黨臣既備數禁

近不能盡忠奉公陷於朋比烏可苟逃譴責欲望聖慈
特賜恩造容臣以祠祿省愆於山林之下仰瀆聖聽臣
不勝戰慄之至取進止

辭免兼直院劄子

閏十一月三日

臣今月二日准尚書省劄子奉聖旨洪某兼直學士院
日下供職臣聞命震驚罔知所措伏念臣攝事三時盡
窮五技仰不能宣布聖意鼓動四方而今之世俗好惡
各有偏私毀譽初無公道臣之代言又不能俯合衆論

常致詆媿兼內外兩制文書填委日不暇給臣之宜去
久矣特以獨員無所辭避今者幸除翰長私以自慶臣
已即時解印罷權申知三省豈圖恩渥反有兼直之命
臣若強顏貪冒則是宜去而留因退而進汨喪廉恥無
以自恕欲望聖慈憐其才盡察其由衷曲賜矜允使免
譏議干犯天威臣罪當萬死取進止

第二劄子

閏十一月六日

臣今月三日繳進辭免兼直學士院恩命准尚書省劄

子闕

涉獵之學文辭蕪類叨攝視草

積有愆尤既已形之臺評又復列之糾疏非聖造保全
特賜庇護則臣雖竄黜未足塞責已嘗瀝懇求去仰蒙
天語曲留臣以軍事方作而掌制獨員不敢堅請談者
又謂臣來自淮東奏陳張浚妄費致浚因此罷相黨枯
骨者視臣如仇敵故投匭之章連瀆淵聽幸今翰苑已
有長官書詔亦不壅併尚令廁迹實為冗贅兼臣屢有
封繳浸招怨怒若不知退必致顛危欲望聖慈施天地

之大恩全小臣之終始畀以一郡使之推行德澤少助
涓埃異時別有使令臣死且不避冒犯威顏臣不勝戰
汗之至取進止

盤洲文集卷四十三

欽定四庫全書薈要卷一萬五千七百九十四

集部

盤洲文集卷四十四

宋 洪适 撰

章奏四

乞罷中書舍人劄子

臣能薄材下靡有寸長過叨誤恩備數兩禁常懼無以圖報天地之德惟知奉公守職不敢附下罔上以邀譽避謗近因繳駁莫汲差除與朝廷之意背馳臣有語言妄發之罪宜在譴訶之域即具劄子乞賜黜責緣未得

班次已實封投進未蒙施行伏望聖慈憐臣孤立察臣
無用速賜罷遣庶使么微之蹤不致異日顛沛冒犯天
威臣不勝戰懼之至取進止

論邊事劄子

十二月十四日

臣待罪從班獲邇清閒之燕頗亦預聞陛下英武之略
得以仰窺聖志之萬一然人材兵力與夫帑庾之積俱
不能上副宸衷致使陛下委曲以結和好臣又以見陛
下矧方為圓抑剛為柔者凡以仰奉慈宮俯安黎庶為

宗社計而然也臣區區愛君之心惟願陛下垂意內治
常若臨敵日加一日則善後之策持久可成和戰之事
今姑置而未論然所以誤邊計而弱國勢者豈不究其
所自乎既備禦略定若不推原誤國之人奮發剛斷大
明誅賞則臣下無以懲戒國勢無以振起臣敢昧死略
言之竊觀敵人犯淮終成和議如期歛兵初無過外邀
求有以知其本無必欲用兵之意儻泗州不先撤戍彼
必不能近淮既近矣而邊城守將不望風遁逃則彼必

不敢直渡旣渡矣清口之戰儻山陽大將出師以掄急則魏勝不死若又有功則是淝水之役也敵旣留連淮上兩月惟六合有堅守之名其他例循三舍之避略無尺寸之功儻能出奇小勝亦足以挫其鋒而議和有氣此之不能及王朴已回乃有飾詞欺君者是數等之人欲望睿明間出奎畫聲其罪而治之則天下欣快矣又兩淮逃徙之民散在江浙飢凍瀕死雖聞故鄉可歸安能便有生業臣愚欲望陛下特捐內帑分遣中都官往

緣江州縣於其欲渡之際計口賑之以助其歸則實惠沾洽人人知陛下愛之如赤子則驩欣鼓舞變愁嘆而為謳吟矣冒犯天威臣不勝戰懼取進止

改定德音貼黃

臣所撰進德音其中云正皇帝之尊稱為叔姪之敵國今日付出三省所進詔本改尊稱作兼稱改敵國作與國雖云皇帝者兼三皇五帝之稱若摘取兩字則文意不顯亦是語病又與國雖是黨與之國亦有謂之所與

之國者臣輒併將所換二字除去却意全而句健或未
允當更乞聖裁

論國書劄子

六月二日即
日御筆依

臣准尚書省劄子奉聖旨令學士院撰賀大金上尊號
國書臣聞之魏杞嘗見送伴使云相繼又須有報謝使
來今既遣賀使臣欲於國書之末帶入一句云且謝使
華之辱伏乞聖慈特賜處分

辭兼中書舍人劄子

即日御筆依

伏念臣材智學問分無可採代言之久常懼不稱任使之意今既叨居翰苑用之已踰其分尚兼西掖實妨進賢之路欲望聖慈特降俞音俾免兼職干犯宸嚴臣無任戰汗之至

辭免簽書樞密院劄子

六月九日

臣伏蒙聖恩除臣端明殿學士簽書樞密院事特降中使宣押臣赴院治事者臣聞命震驚罔知所措竊以贊帷幄之畫列股肱之臣上則三階以之齊光下則輿人

之所瞻景非有超卓兼資之美者莫宜居之如臣者學
不足以達國體識不足以苞遠猷再入帝城獨叨恩遇前
後親擢曾無先容鏤骨捫心秋毫未報外日入奉清光
伏蒙玉音使補政路之闕臣嘗跪奏以臣之繇力薄材
倘司翰墨之職尚猶可以勉強至於兩地重任必當選
用老成有才望之人爲之遜避再三私有回天之喜不
謂信宿之後渙命竟出跼蹐戰兢罔知自恕之計敢犯
咫尺威輒披誠悃伏望皇帝陛下察其無用追寢誤恩別

求時髦以允公論臣無任祈天俟命激切屏營之至取
進止

辭免賜衣帶劄子

臣今月十九日正謝伏蒙聖慈例賜臣對衣金帶魚袋
鞍馬緣臣於今月初九日已蒙聖慈特降中使賜臣笏
頭金帶魚袋牙簡鞍馬今來儻或疊冒寵私在臣愚分
不遑安處伏望睿慈將例賜金帶魚袋等特行寢罷庶
遵彝典不勝幸願取進止

乞贈高祖劄子

臣輒有私悃仰塵天聽伏念臣上世以農桑為業至高祖臣某始奮金籛之志有子蚤世獨攜二孫遠徙州城擇賢師修儒業故伯祖臣某以進士起家繇南床而陟瑣闥至先父臣某實傳遺訓遂入翰林逮臣之不肖兄弟獲承先蔭浸叨顯仕益相繼三世矣今追榮之典再及曾祖至於東宮三師獨念高祖未霑一命無以為九泉之寵臣該遇覃恩併應副軍須皆有轉一官公據不

及収使欲望聖慈許將前件恩賞回授作高祖父母贈
典庶得少伸報遠之情干犯宸嚴臣不勝戰汗之至取
進止

貼黃 臣檢照會要所載李昉贈所生父母王曾陸
軫贈伯叔父邢昺贈兄張士遜贈表兄皆非常典係
是一時特恩伏乞聖裁

乞寢贈典劄子

臣不避斧鉞之誅薦瀆天聽臣比以回授高祖贈典冒

昧陳乞仰蒙睿慈曲從所請竊聞後省留黃不行臣以
螻蟻之微未有一毫報國而尊祖私情遂以妄發為清
議不許連日戰悸魂神去幹雖亡者不能霑被榮章而
已蒙渙許之褒贈則潛德亦以少顯九原有知豈不圖
結草之報所有已降旨揮欲望聖慈特賜追寢干犯天
威臣死有餘罪取進止

乞罷第一劄子

臣比有狂妄之請為給舍所論即具劄子乞行追寢仰

蒙寬恩未賜誅責不避再三之瀆薦有愚衷徹之淵聽
伏念臣始以高祖篤教子孫變犁鉏而為簪笏先臣存
日每以恩不可及為言臣幸備數近列有未轉兩官若
回授與子弟陞轉則內愧於心下媿於泉壤故推述先
志求為亡者之榮雖追贈高祖未有前例而國朝會要
所載有贈其伯叔贈其兄贈其表兄者皆在常法之外
故臣援此典故謀之朝廷始敢仰塵丹宸之前不料竟
以妄發遂遭封繳臣身綴政地私請犯分雖陛下赦臣

而臣若安然在位則人益以臣為罪矣臣跼蹐戰慄家居待譴欲望聖慈俾臣罷免庶幾不致復絳清議冒犯天威臣不勝皇懼之至

第二劄子

臣已納劄子乞賜罷免屏息俟命未見施行伏念臣材無可用陛下過聽擢之機宥未有一言一事可以利國庇民而私心妄發遂奸物議連日恐懼無地自處蓋繳章便同簡劾事無大小等是為人詆訶豈有身在廟堂

之間瑕疵已遭嗤點而猶欲貪榮固位臣雖自恕亦不可得況臣近居封駁之職蓋嘗以此責人以今視昔何施顏面更玷朝列方陛下大明黜陟申儆在位有臣如此顧亦何所用之伏望睿慈早賜處分許臣解印綬而去則臣未填溝壑之前皆報恩之日月也干紊威顏臣無任戰汗之至

辭免叅知政事劄子

臣伏蒙聖恩除臣叅知政事特降中使宣押臣赴都堂

治事者臣聞命震驚罔知所措竊以人君以二三執政
圖回天下之務非得當世之通儒則安能仰副眷倚之
隆而任憂責之重如臣者挾章句綴緝之學僅能不曠
翰墨之職而已雖懷尊主興邦之心而材識不逮觸事
面墻徒抱微忱初無一得自叨機宥常恐竊位誤國夙
夜慄慄未有上印之計豈期渙命俾叅大政是猶責跛
鼃之一日千里則折骨絕筋其亡可立而待伏望睿慈
曲賜哀憐改畀真賢不致虛授臣無任

論湖北軍須劄子

臣伏見諸路總領所軍儲並係戶部措約科撥而所得
州縣之數尚有拘催不足者向來各有樁積錢物可以
那融緣數年用兵侵耗已盡今或有以急闕為言者戶
部亦緣財用匱乏無以應副只是行下令將樁積錢物
那融支遣謂如湖北路去朝廷甚遠今王炎改除已數
月代者猶未定湖廣盜賊方梗道路必有阻隔故張宗
元以將母為辭懼於之官臣謂今日外患雖少定正恐

封疆之內有勤宵旰之憂者要當止於未萌則斯民無塗炭之苦諸處總領所少有急闕支遣失時一夫叫呼噬臍何及臣愚欲乞聖斷行下令湖北淮東西總領所開具目今樁積并見管實數及每月合用數目上朝廷及戶部覈實如委有不足去處即將實有窠名錢物添撥儻使常有一兩月儲積則拘催按月未至者可以通那支遣仍乞自今以往月具收支所管的實數目申省部稽考無為虛文以圖善後所有王炎及臣男規劄子

四紙同此進呈伏望睿覽留中免賜降出取進止

進太子冊文劄子

臣奉勅撰皇太子冊文臣學問荒蕪詞意拙澁國有鉅典無以鋪叙綴緝僅能成文干犯宸嚴不勝戰懼謹繕寫進呈伏乞睿覽更賜處分

納密院窠闕劄子

臣等伏見吏部員多闕少守選者留滯日月緣右列小官皆非臣等所識不能知其為人密院雖有窠闕臣等

不敢容易差注若俟其干乞一一為之取索考覈則瑣碎失體若徒留窠闕各而不與則小官仰祿無以進身臣等相度欲將密院知州軍總管鈐轄路分都監將副等闕依舊存留外所有諸路帥司將領指使川廣湖南北城寨主兵官共一百三闕乞發下吏部依格差注如將來密院或欲於其中使闕亦許通用庶幾少塞干求之門而開公平之路取進止

辭免兼同知樞密院劄子

臣准尚書省劄子奉聖旨汪澈可除知樞密院事洪某
兼同知樞密院事伏念臣材器智慮蔑有可稱偶承人
乏躡至近輔當陛下勵精庶政循名責實之秋臣鞭策
駑鈍無以自強顧望輕不能服衆力小不可任大戰戰
慄慄常有慮職之虞特以坐席未煖不敢乞身幸今邊
鄙又寧少休甲兵之問樞臣已有兩員不必更使素餐
其間以重誤國之罪伏望聖慈特寢兼職庶幾可以掄
過免蹈大譴臣無任祈天俟命激切屏營之至取進止

辭免撰太子冊文賜銀絹劄子

臣今月十四日承中使李綽公文奉聖旨以臣撰皇太子冊文賜臣銀一百兩絹一百匹臣偶列近班際遭絳典初無文采可備使令塵玷寶冊已積戰懼遂叨錫予安敢虛受況當聖政節省之際而備數政途所宜體國竊伏以思尤難下拜伏望睿慈許令辭免庶使小臣可逃貪鄙之刺干犯宸嚴臣無任皇懼俟命之至

辭免太子冊禮支賜銀絹四百八十匹兩第一

劄子

臣等恭遇陛下諏日之吉發冊建儲幸叨近輔獲相盛儀伏蒙聖恩例有支賜竊自惟念臣等不材備位已負素餐方國用不足所當裁損豈敢貪饕錫賚獲戾清議所有已降旨揮內臣等支賜銀絹欲望聖慈特許辭免干犯宸嚴臣等不勝戰懼俟命之至

第二劄子

臣等伏蒙聖恩以皇太子受冊禮成例賜銀絹即具奏

劄乞行寢免伏奉御筆已經裁減不須多辭臣等近以
差充禮儀使及書撰冊文嘗霑銀絹一百之賜辭免不
從已遂下拜今又以宿衛行事之微勞復叨腆予實惟
稠疊雖臣等材品駑下不足以表儀在列而伐檀貪鄙
之刺不可不畏伏望聖慈特從懇請使免譏議仰冒天
威臣等無任戰汗之至


辭免提舉玉牒劄子

臣伏蒙聖恩差臣兼提舉編修玉牒臣聞命震驚罔知

所措竊以國家受天明命聖聖接武祖功宗德寫之琬
琰所以紀重規疊矩之懿以昭示萬世為不刊之書非
台衮儒先未易典領顧如臣者識不足以罔羅異聞辭
不足以揚厲偉績尸此筆削人其謂何伏望聖慈俯諒
愚衷特寢成命干犯天威臣無任戰懼隕越之至



盤洲文集卷四十四



總校官進士臣胡榮

校對官庶吉士臣李廷敬

謄錄監生臣孫珩